

摘藻堂四庫全書薈要

集部

欽定四庫全書薈要

集部

御選明詩卷九十三

詳校官原任事臣李斯咏

欽定四庫全書薈要卷一萬八千五百九十三

集部

御選明詩卷九十三

五言長律二

徐禎卿

謁嚴子陵祠

言訪羊裘隱荒臺迹宛然嚴崖祠屋綴天漢客星懸伊  
昔風雲感丘園束帛多神龍不可繫造化獨深全去矣  
孤蹤邈懷哉大澤偏釣竿何孑孑石瀨故濺濺郡以高

名著山依汗簡傳餘風猶激懦聖代更招賢圭組誰憐  
辱襟期本尚玄終焉赴空谷寤咏白駒篇

與江夏尹餞于舍人於黃鶴樓

未有干戈地能令棟宇全乾坤餘壯觀荆楚鬱山川鶴  
唳寥天迴江深禹廟前舟檣控南北節鎮此旬宣令尹  
乘時暇使君同俎筵炎蒸飄不到虛爽境何偏乃繼登  
臨跡空懷作者賢風煙一回首今古共淒然握手將安  
適經秋未擬旋迢迢沙際月遙憶桂陽船

廬山

豫章山水郡廬嶽此深蟠吳楚開雄鎮東南表巨觀中  
天浮黛色百里曖晴巒漸近雲消豁俄驚勢鬱盤錦屏  
圍合沓玉筍屢巔屹詰曲羣形變登臨萬象寬風高六  
月電氣慄九江寒石鏡明花外香爐出霧端劒芒遙矗  
矗龍脉故蜿蜒瑤草幽難掇青蓮秀可餐赤城虛瀑布  
彭蠡更波瀾禹跡於茲盛崇功振古刊壯懷凌絕頂倦  
鳥息飛翰霄漢心何有沈冥性所歡將修梵門術欲上

羽人壇淨社花垂白名巖竈覆丹昔賢非不達於道自  
相安愛勝真忘返遺榮亦未難聊須偃松竹遂可挂纓  
冠祇為懷佳侶淹留獨寤歎

題唐氏園池

堂上琴書暇名園愜宴游綠陰交樹石白水散田疇林  
步常驚鳥沙眠且狎鷗開軒桑柘接當徑草花幽野老  
時相過村醪擬共酬陶然松菊下乘興足淹留

靈隱寺贈靜公

聞有千年寺長松信許深沖虛半樓閣落日更登臨舟  
楫窗中小勝蘿天際陰江流明暮靄石澗響空林蟠據  
雄都會風煙異古今幽真予有慕詩義爾能尋雲翼無  
言健淵魚本自沉終期白蓮社來就玉山岑

各賦隱士得魏仲先贈金陵顧徵士

何處蓬山宅汾陰傍漢宮冥棲紫芝客長嘯綠雲中忽  
佇甘泉駕遙尋河上公玄風那可掇大道本難窮夫子  
金陵隱心將靜者同瑤枝無以獻歌此寄喬嵩

王九思

村居漫興和馮孝甫

愛爾村居好乘時玩物華  
垂楊風外燕芳草雨中蛙  
茅屋清溪遶柴扉碧樹遮  
挾筐晨摘菜燒竹夜煎茶  
四野青疑畫羣峰翠轉加  
出門還自笑撫景向誰誇  
蟋蟀催織家人解績麻  
綺樓臨大道羅扇舞嬌娃  
若以邨方市猶將瑟比琴  
白頭聊遣興濁酒正須賒  
柳岸連花塢山顛及水涯  
快遊時跨蹇安坐或乘車  
野渡漁初唱平



林鼓亂撾閒居逢聖世稔歲喜農家醉後人如玉詩成  
筆吐葩仙區聞吠犬喬木見棲鴉燈火開墳典星辰掃  
莫邪昌黎誰與共咏社得劉叉

王廷相

過虎耳泉

南瞻虎耳嶺崒嶭雙峰流水堯田畝青山禹貢封圖  
經缺古跡勝覽念朋從花木迎春早幽深引興濃谷晴  
煙裊裊磴煖水溶溶地喜多靈境人疑有卧龍恍如兜

率界時復羽仙逢落景懸崖白飛霞度水重蛇牀生紫  
洞鶴翼下高松鬱有終焉思慚非塵外蹤

送鄒司徒

達道黃山子功成即引年思尊張翰興詠桂小山篇歸  
老真仙分先幾合聖筌補天術未試探日志空傳夢澤  
深龍卧荆門早鳳旋異時延國老詔下白雲天

雲臺觀

玉臺何所擬方丈海天東恍惚金銀闕迢遙日月宮丹

梯懷窈窕飛構閃玲瓏積翠含元氣通靈倚化工青童  
拾水碧羽士駕星虹偶向塵塗曲來觀福地雄大還雖  
浪議嘉遯亦高風濠上追莊叟匡廬憶葛洪夢隨蒼鶴  
返嘯引紫霞通嫋嫋吹笙過飄飄采藥同何時謝軒冕  
託意入無窮

顧璘

丙子元日於郡齋作四十韻

南紀江潭遠東風節序移流年傷久客多病負明時稼

稽功何補鶯花興匪宜嶺梅虛照眼江柳莫搖絲憶昔  
為郎日承親樂在茲都城依斗極畫省綴雲司祿米供  
調膳家園奉杖藜閒情潘岳賦燕喜魯人詩棣萼連庭  
發槐陰拂地垂書編長枕藉酒竿亦淋漓契合多良友  
招邀慰所思聲華傾座重精白寸心知松檜寒逾勁驂  
騮老不羈已堪徵道義況更得師資西漢才方盛東周  
夢豈衰立談期化理傾倒絕猜疑中路罹多難專城試  
一麾梁陳高賊壘河朔走征旗苦乏勤王略空懷報國

私援枹臨矢石飲血撫鰥嫠僅免投豺虎方思伴鹿麋  
愚蒙仍觸法覆載本含慈斧鑕逃輕典丹青發朽姿恩  
波猶五馬竄地異三危水鏡開城觀星躔壓地支國風  
饒比興民俗重畊犁桃水居人樂華胥帝載熙頗容山  
簡醉未釋賈生悲信美非吾土浮名已後期形容麟閣  
遠羽翼鸚圖卑即事驚華髮無階叩赤墀大懼惟菽水  
野性一茅茨納履思投足談經得解頤文章關不朽氣  
格許誰追能事輸前列洪鈞貴自持陶鎔兼物類渾樸

斷人為郁郁希游夏勞勞去管伊行藏俱自得筋力豈  
空疲細雨衣襟淨深山卧起遲時尋老漁父同釣楚江  
湄

陳沂

送石太宰代祀泰山闕里

上卿膺顯命元祀向東方喬嶽瞻青岱生民有素王邁  
邦齊望秩過魯式趨蹌埽地如躬陟振衣儼帝將諸峰  
求禪土數仞入宮牆仰止巖巖外周旋翼翼旁俯窺宜

小壤密造豈升堂峻極神應降惟馨道益光往哉公不  
忝簡在事非常媿乏崧高頌風雱代詠章

周金

登玉泉亭

勝日成遊覽名山氣鬱蔥星臨箕度北龍結太行東萬  
壑爭迴馬千流競引虹雲霞連朔漠臺殿倚鴻濛鳥背  
巖松落螭頭石竇通晴光含淑景黛色照長空野藥低  
垂蔓山花半隱紅乍驚樓閣苑復訝入崆峒地勝塵囂

迴心閒物我同悠然發長嘯遺響落飄風

題俞國昌畫送周伯明侍御擢大理丞奉母還

南都

碧樹丹霞外孤亭返照中江流連瀚海山勢逼崆峒渡  
古欹橋斷村荒田岸通銜杯秋色薄卷幔霽煙空望裏  
星河迴吟邊雨露同北臺餘爽氣南國避高風竹筍迎  
船好江魚入饌豐平生甘旨意況逐板輿東

吳山



廣信南山寺讌集和周行之韻

栖栖事行役四牡各西東此日雙旌合他鄉一醉同登  
臨尋古寺搖落感秋風白雁懷江館朱幡下渚宮山容  
浮紫翠林影亂青紅報國心常切懷人話未窮幾時林  
下路杖屨會從公

楊慎

送彭胡之官保靖

青楓帶楚鄉紅旆引吳航溪洞連辰浦峯巒近酉陽稻

田多有歲橘樹不知霜葦簫祈盤瓠鼓祠賽竹郎蠻歌  
花節鼓公讌桂沾漿因爾詢風土圖經遠寄將

初寒擁爐欣而成詠

閉戶當嚴候圍爐似故人胡桃無賜炭

宋世御炭以胡  
桃文鵲鵲色為

上以賜內  
直學士

楫杙有窮薪兒免號寒喜翁便永夜親燄騰

金菡萏灰聚玉麒麟剪燭休論跋傳杯莫記巡煎茶浮  
蟹眼煨芋皺蚪鱗一點那容雪千門預借春灞橋何事  
者凍縮苦吟身

雨中夢安公石張習之二公情話移時覺而有  
述因寄

滇越鄰天竺邛來隔夜郎五離殊畛域一別異炎涼竄  
逐他時竝羈懷此夕長歡娛漸迢遞晤語落冥茫嵐靄  
歎蒸國煙波瘴癘鄉秦關生馬角蜀嶺斷猿腸折坂沉  
黎壁懸繩沐若梁南盤堆枸醬西氍緝枕榔羅漢標孤  
檜觀音映遠楊街溯龍簇市海貨貝投莊卉服喧叢薄  
雕題列大荒逡巡烏爨弄

烏爨弄唐世  
取入樂府

噉咷白狼章霄

漢鳶飛站星坻蟲飲光堞風氛甚惡箇露毒仍防樹偃  
申家屋荷凋屈氏裳獨愁吟皚雪九辯感清商永晝消  
碁陣流年付酒狂抨弓穿鵠鷄鼓柹泛螳螂康樂吳趨  
激鍾儀楚奏傷盼歸頻握糈憶舊幾停觴夙昔交遊日  
崢嶸翰墨場金蘭通氣味桑梓借徽芳健筆誇鸚鵡靈  
陶戛鳳凰執鞭從李杜傾蓋許班揚賈誼三書切相如  
四賦良軼塵追騷褭缺岸倚踦踈百斛扛文鼎千帆掣  
駛檣仙才輕紱冕公望重珪璋蒲席青規地薇垣紫界

牆璇閨高曳履瓊澀儼分行笏捧綈囊奏衣飄畫省香  
輦花簪矗矗墀草珮琇琇瀑直承明下經過韋曲傍翠  
微橫半岫白水溢方塘暝宿招提境雲眠薈蔚房樵歌  
塞薜荔漁影照滄浪倏忽嗟岐路參差散頡頏薰華晨  
逗雨蓂莢曉凌霜拂鬱干將劒聯翩戍客裝峨嵋臨絕  
頂灤暨宛中央樾蔭江楓赤庭蕪塞葉黃閉門非泄柳  
偎壘詎庚桑紛緒琴心嬾衰顏鏡匣藏屏居親狹狷坐  
嘯和蜚蜚張敏情還劇安期好不忘形骸元脫落身世

且徜徉蚓壤甘怡槁鴻冥豈慕梁艱虞寧暇問吾道任  
蒼蒼

送周子庚都憲撫邊

肅肅戒嚴程蕭蕭邊馬鳴龍庭新節制騎省舊才名玉  
律調秋氣金鏡寢夜聲隴雲笳外結關月笛中明鸞朔  
臨秦障鵠觚繞漢城沙汀行見雁海樹坐聞鶯游霧懷  
前賞歸風遡別情佇聽歌凱入一舉塞垣清

薛蕙

送周子賢按貴州

萬里牂牁路炎洲百粵南懸梯穿鳥道流沫下龍潭赤  
坂鼃鼃出玄厓日月含虹霓蒸海氣煙霧灑春嵐飛猺  
緣篁竹垂猿墮石楠橘花香細細藤刺綠毵毵嶺外青  
驄馭臺中白筆簪秦冠高鑱柱漢節照金函行邁應多  
暇登臨素所耽江山吟謝客物色助清談送遠都無緒  
憂時且不堪安危廷諍地遲子促朝參

寄崔內翰

病起身仍健秋來興不孤心情那可減肺氣欲全蘓  
蟻穴依牀席蛛絲織畫圖褰帷窺物色倚杖理荒蕪撥悶  
憑詩卷忘形付酒壺昔賢遺軌躅餘力誓馳驅良史傳  
經術高才繼典謨赤鯨凌海水翠鳳上天衢仙籍通羣  
帝文星近六符馬遷慙實錄劉向謝醇儒玄覽來神契  
冥搜入奧區蓬萊披琬琰太乙下虛無顧我惟書肆知  
君類說邪憲章崇闕里辭賦陋鴻都東魯宮牆闕西京  
戶牖殊百家流汎濫六藝混泥塗未覩崩頽振深思筆



削扶飛騰愁失墜衰颯迫號呼落落親朋遠悠悠歲月徂提攜如有分終願託微軀

送楊石齋

社稷功成後山林避寵年遭逢誰可並出處獨超然反側當前日經綸邁昔賢殷憂興聖主至治格皇天凶豎同摧朽蒼生盡解懸廟謨隨指顧臣節見周旋智勇干夫敵勲勞百辟先賞仍虛裂土名已重凌煙握璽慙周勃揮金笑魯連急流嫌盛滿介石慕貞堅許國心恒切

還鄉興偶牽留侯初相漢樂毅晚辭燕異渥絲綸數高  
風進退全草停黃閣詔花簇錦江船水檻星橋側茅堂  
雪嶺邊雲霞深綠野卉木富平泉事業存鐘鼎儀型照  
簡編累朝瞻翊戴四海憶陶甄白首歸休記青春送別  
筵衣冠望行色端不異登仙

馬汝驥

送王太學歸里

君作橋門士還稱梓里賢相從共霄漢此別各風煙谷

鳥朝猶媚山花晚自鮮  
路深恒嶽外城迴大河邊  
律轉朱明日雲通紫塞  
天光輝萊子服留滯祖  
生鞭杜若騷人慕蒹葭  
旅客憐歸哉興不淺短  
翮愧聯翮

登五華寺閣十韻

寶閣開金仞丹梯繞五華  
春攀入霄漢晴望出煙霞  
碧玉宇塵初淨瑤京路不遐  
西方標鷲嶺北極壓龍沙  
臺倚黃金直泉飛白玉斜  
綵雲張棋繡朱日度窗紗  
傍檻聞天樂巡檐拾雨花  
古松扶佛座疎竹間僧家  
山接居庸

樹川浮瀚海，槎登臨雖信。美詞賦愧三車。

十六夜吳舍人宅觀燈

巧匠滇池出，高人漢閣懸。蛛絲雲織細，翠羽水翻妍。  
曉暮霞齊落，陰晴月共圓。歌塵飄宛轉，舞袖照連娟。  
荷剪千枝火，蘭生百和煙。市星春色亂，堞霧夜光偏。  
鳳架寧堪對，鰲樓詎可憐。願同佳麗地，長醉豔陽天。

張治

送趙白崖之任安成

憶昔荆門路青山趙氏居石橋寒澗細古木暮村虛  
吾子今才俊為官且簿書安成饒禮俗封壤帶衡廬  
涼露侵征旆秋星伴使車上林相別地應惜雁行踈

童承敘

雨中送駕和研岡二首

春祀瞻陵廟宸遊出帝城豐隆扶翠輦屏翳抗龍旌  
柳色迎鑾細鶯歌向蹕清寢園佳氣合馳道瑞煙平  
沙軟千官擁泥香萬騎鳴精裀勞聖主數傍碧山行

法駕開雲幕慈闈擁萬城社煙隨采仗谷雨落青旌春  
豫流鮮澤皇游覽太清沾衣知寵渥潤物感昇平山繞  
鑾輿淨泉當帳殿鳴傳宣戒龍舸還汎玉湖行

文徵明

期陳淳不至

美人期不至寂寞繞階行短架閒書帙幽窗聽履聲空  
令開竹徑深負洗茶鐺春草暮雲合梅花初月明蹉跎  
殘路在次第小詩成未敢輕知已終然媿後生新年池

上夢舊雨酒邊情眼底非無客相看意獨傾

立春日遲道復不至

東風吹綵燕曉色動簾旌遲子不時至南樓春自生裁  
詩供帖子閣酒聽啼鶯白日流雲煖梅花初雪晴閒窗  
落香燼殘火宿茶鐺敗葉鳴階砌分明識履聲

謝承舉

贈喬縣簿乃弟白巖宗伯席上得兄字

文史承家學冠裳繼世英壯年方識面少日已知名氣

岸平山峻風神晉水清  
昂藏鷗獨舞奮迅鵠高橫  
受職初分歛催諸暫過京  
捧郵頻速驛勸稼復觀畊  
豈擬桓溫喜終令鑿齒迎  
連枝依地主同氣得春卿  
常棣詩重咏墳麓韻互鳴  
茱萸偕九日風雨會彭城  
共被何留戀朋簪況合并  
兩都遊宦意十載別離情  
舊念通家誼新開煖社盟  
我行應是弟君齒合居兄

傅汝舟

遊玉笥山



玉筍開山遠金壇瞰谷重靈光流世界瑞氣渾春冬險  
澀千盤磴參差百轉峰宿雲長抱殿遊鶴不歸松虎澗  
泉為雨鯨樓石作鐘韭抽堯葉淨桃發漢花濃道士隨  
黃犢仙人駕赤龍丹爐七焰滅瓊籙九霞封亂竹通飛  
佩繁芝碍放筇愧為福地客叨躡羨門蹤

高叔嗣

送管平田先生頒封秦府歸省

五等周分國三王漢世家日聞敦帝族時見遣皇華剪

土仍鶉首疏邦自犬牙秦關通使節灞水渡征車過邑  
恩難屢登堂禮更嘉何如北山客行役動長嗟

次韻田水南見過之作

夜雪連窮巷朝來片日暉故人停駟馬問我掩雙扉自  
出知誰是相看能爾稀家僮釀酒熟獵伴射禽歸草具  
成賓饌木綿對客衣歲寒心不淺日暮意難違客興催  
花發農功候鳥飛期君前浦泮預指釣魚磯

冬夜寄友人

客地殊不樂褰裳夕望通葭灰欲變節桂魄幾乘空楚  
奏今雖切商歌古亦窮兔園推上客狗監數文雄留滯  
無萱草攀援有桂叢何因辭世網去矣作冥鴻

省閣率爾題寄同懷

下車春草歇掩閣夏雲深情以軒裳倦愁緣節候侵訟  
庭白鶴毳解宇碧山岑乘夕恣幽屨憑高敞鬱襟連天  
通漢水多雨暗楓林畏鵬非前志為鵬想壯心越鄉誰  
不念題此繼莊吟

蘓祐

送潘僉憲考績北上

尊酒章門道迢遙望帝京日懸雙闕迴霜落兩湖平鴻  
績陳虞典驪歌奏楚聲音塵應入夢雲樹已關情紫氣  
蒼龍劔清華碧玉珩解攜助行色離思滿江城

戚賢

送馮南江謫戍歸吳

落落南江客蕭蕭事遠遊風塵莽分手雲物迴深愁柱

砥中流急難鳴山雨秋調高應不解道在又何求賈傳  
還前席萊公亦此州聖明元有待珍重一時留

唐順之

詠天壇梅花

名卉來南土奇葩曜上方花遲疑避雪葉早為迎陽靈  
液滋玄幹仙雲拂素裳無言恒斂笑不謝暗飄香夕伴  
芝房月朝承兔苑霜飛窺玉女鏡舞撲羽人觴擬結千  
年實先呈五出妝帝羹如可和持此奉明光

自述

祇為抽簪早歸來已四春本非食肉相猶是飯牛身負  
郭無新業灌園有舊鄰磯邊獨釣客隴上耦畊人相見  
一相笑吾今罷問津

奉命分祀孔廟作

後聖禮先師斯文端在茲將陳百官富詎止一牢祠入  
室瞻遺器園橋展盛儀樂堪三月聽莫想兩楹時執鬯  
元公肅捧璋髦士宜鄙儒叨小相端甫奉前規

冬至南郊

明王敦大報泰時禮神君位以南離正宵從甲子分月  
臨太乙館星動羽林軍除道疑登岱鳴簫異度汾聲容  
六變合海嶽百靈紛封檢微題字屏帷悉畫雲神光人  
共見天語帝親聞盛跡誰能賦多慚扈從羣

李開先

村遊晚歸感懷

青山銜半日別去莫淹留煙斂孤村晚蘆殘兩岸秋僧

歸山後寺人倚夕陽樓籬菊寒猶豔鄰牛夜不收奚奴  
為候吏驚騎勝鳴騶世態如雲變年光逐水流塞翁非  
失馬莊叟歎犧牛橫笛吹新恨寒砧搗舊愁食場駒皎  
皎在野鹿呦呦謗以虛名起官因愚直休心長馳北闕  
衰不夢東周日損潘郎貌霜凋季子裘詩慚何水部狂  
學白江州鴻寶終湏獻明珠且莫投山精何處采石髓  
杳難求無論朝中客閒人亦白頭

陳東



詠神樂觀梅花

素質舒玄圃清芬裊碧紗  
自將幽獨意不逐豔陽華  
避暖遲開葉凌寒早著花  
瓣輕飄易墮枝曲影從斜  
雜雪明春砌隨風入暮笳  
何須飛寶曆長此奉仙家

入閩

海國深秋別山關入望窮  
人家青壁裏鳥道綠蘿中  
地暖收蒟葉天寒折桂叢  
嵐蒸晴亦雨瀑落靜還風  
靈藥繙經識訛言待譯通  
問畊留野老賦食與山童  
直是忘

機甚非將大隱同

吳子孝

送楊獻甫之官四川行間參軍十二韻

越雋憐君去相違萬里餘  
軍參孫楚事筆草孟嘉書  
魚鳥驚新陣貌貅耀舊旗  
枕榔山葉暗躑躅野花疎  
村女誇幢布羌人趁葦墟  
地當三蜀險府控百蠻居  
關徼留繻日風雲按轡初  
巴渝歌甚樂兵騎報寧徐  
才重松州幕恩垂洹水車  
遷喬應不忝學武昔無如  
贊畫元戎喜

籌邊勁寇除少年誰得似俠氣滿儲胥

蔡汝楠

奉和皇甫百泉玄武湖供事

解說澄湖上高齋擬石渠九州分職貢萬戶入圖書常  
侍傳符後郎官對草餘綈緇隨處滿人吏此中疎積水  
神龍澤青蓮太一居鳥啼喧靜院雲煖護幽墟式重思  
周典先收憶漢初不知供事日仰止意何如

林應亮

曉出阜城

嚴城霜月靜村郭曉鐘稀時序冬驅馬行藏夜卷衣鳴  
騶衝雁度征旆帶星飛河以東川隔山從朔郡圍人煙  
迷古戍雲物辨中畿沙色晴銜日松陰薄弄霏雞聲萬  
井曙林火數家微騎滑防水圻塵輕識露晞湖關三輔  
列玉帛八荒歸今日朝元會誰霑賜醴輝

周復俊

偏橋山行喜秋霽漸霽

永夜風搖月凌晨霧薄空竹潭分窈窕杉嶂沓冥濛直  
是林霜化終隨水靄籠氤氲初動石巖巖正含礲隱樹  
啼秋狄淪山斷晚鴻谷深將澤豹川迴乍垂虹飄忽林  
巒失莊嚴浦漵通鷺翩應緬邈泉溜始玲瓏漸得凌玄  
昧從茲詣朗融天遙孤碣外日涌大川東柳吐村邊翠  
花爭水上紅津樓方演漾峯閣轉青蔥綉幙明芳薦油  
車暎茂叢觀心澄白月延脰穆清風謝客淵情蕩嵇生  
藻氣雄長途任明晦獨嘯紫巖中

查秉彝

贈悟齋吳諫議奉使琉球

玉冊傳殊域天朝簡近臣漢官陳法從周禮貴王人橫  
海樓船使明河博望津長空浮遠樹疊浪淨高旻馳傳  
祥飈護揚旌水怪馴彭湖晴似練天界雪如銀雨過龍  
宮曉雲開貝闕真千年存故國八葉沛恩綸異俗敷文  
教通儒羨席珍一新唐號令不數漢和親磊落凌霄氣  
昂藏報主身鳴珂期不遠民瘼陞前陳

喬世寧

馬湖登覽

四海車書日干旌萬里揚  
牂牁今作郡魑魅舊為鄉  
江自金沙出山連玉嶠長  
歲時常霧雨草樹只青蒼  
舟楫通吳楚梗楠足棟梁  
千秋賓上國一統見今皇  
到此真殊域憑高覽大荒  
嵐光生澗壑雲氣滿衣裳  
西徼仍多難當關詎可忘  
天王今有道舞羽為邊防

陸樹聲

贈大司成閻又泉

上地開周鑄西京表漢雍才猷三晉望儒術九流宗講  
幙仍虛席詞場久避鋒暫辭青殿直初授紫泥封鷺渚  
星文燭鴻都劒氣衝雲霄看跼鳳冠蓋喜登龍胄士橫  
經入儒林結駟逢鄭玄名獨播劉向業尤攻延景依喬  
嶽洪鳴仰鉅鏞橋門盈濟濟紳佩禮雍雍超躍須騰駿  
甄收及采葑聖謨垂大訓文教策殊庸就日懷金馬瞻  
辰謁紫峰憑高增仰止析侶恨攀從覽瑞儀千仞蜚聲



徹九重預占天漢上鵷鷺集仙蹤

林懋和

憩玄福宮

碧殿依青嶂丹臺入紫霞聊因駐征蓋復此訪仙家  
洞隱疑無路林凋尚有花山童陳石髓羽客進胡麻  
石上柯初爛壺中景未斜赤松如可見從爾學丹砂

張居正

上林春曉

禁院春光曉皇州霽景浮淡煙籠細草晴旭抱重樓鳥  
影林梢亂鶯聲花外留紅殷桃雨暗綠散柳風柔拂曙  
寒猶峭侵衣露欲流蔥蔥佳氣裏春在五雲頭

成趣園夜讌

秋色冷疎竹秋空點數星水光浮積素山色漾重青泛  
渚驚初到尋源喜再經鶴馴階下影魚失鏡中形畫舸  
輕搖處人稱小洞庭

殷士儋

送趙萬舉守淮安

聞道淮陰郡輿圖屬上游雲連江國曙地接海門秋特  
簡中朝彥遙分南顧憂青山迎列戟芳草待扁舟楚甸  
歌新牧琅邪識故侯津橋通晚泊膏釀課春疇樹色依  
官舍潮聲入驛樓知君富登覽吟興滿滄洲

朱大英

冬日莫雲卿齋中社會得南字

傑士紆名駕龍門駐駟驂高懷傾滿座玄度湛澄潭晏

歲芳盟密虛齋霽色涵菊餘寒砌媚芸積古書醺序朔  
風生北陽回晷漸南露葵烹紫蕨霜果薦黃柑興盡金  
壺醕機忘玉屑談才華稱彥倩名理說瞿曇有客誇能  
七留歡共惜三忘年開雅社竟日縱玄探椽燭宵堪秉  
嚴城引去幘

徐學謨

送殷無美之任峽州十韻

曾識南荆路看君賦遠征山川隨五馬冠帶控三城炎

月移官舫滄洲見吏情巡阡分鳥道卧閣聽猿聲地接  
巴人國天清漢帝營尋源巫峽近彌望渚宮平司馬多  
奇氣深源復令名因知理人暇應羨著書成黃髮甘遲  
暮青雲仗友生為余訪耆舊臨別重牽縈

李萊

春城晚眺和太守十二韻

灝氣橫鋪地崇墉晚望新芒芒九河道繹繹百城春雪  
盡黎陽壘煙生白馬津山川全拱魏關隘半鈴秦事去

看荒壠時清憶古人  
高天歸獨鳥片月下  
游塵地僻投書少  
官閒置酒頻樓如騎  
山起亭擬雪香鄰醉  
眼容疎闊愁腸荷撫  
循鬪雞先自走尺蠖  
漫求伸磊落長歌恨  
踟躕未老身所忻陪  
妙躅歸炬借朱輪

張祥鸞

過寶應湖

曾憶垂堂戒翻成浪  
樓遊深春青雀舫疎  
雨綠楊洲蛟室連雲  
動煙波抱日流乾坤  
開楚澤星野帶揚州  
影曠

天俱入波搖地欲浮平堤控淮浦曲岸東邦溝樹色紛  
高下帆陰遞去留孤城遙若塊亂屋渺如舟緩帶看芳  
杜鈎簾起狎鷗盪胸銀鏡晃對面玉壺秋戍鼓沙村外  
津亭溪水頭當年游宦處重試舊吳鈎

申時行

大閱詩應制

廟略收羣策宸遊簡六師代當全盛日春是大蒐時雲  
捧蒼龍駕風迴翠鳳旗轅門開複道帳殿繞行麾細柳

前軍駐長楊後騎隨虬鬚天策將猿臂羽林兒拂劍星  
文動彎弓月影披連營分雁翼布陣合魚麗禮示三驅  
正鋒藏九變奇張侯仍是豹賈勇盡如羆引滿雙鵬落  
騰空萬馬馳元戎歸節制法從肅威儀詎數誇胡獵還  
欣奏凱期大風歌漢士吉日誦周詩我祖犁庭烈先皇  
保泰規永言思繼述持以贊雍熙

王叔杲

題畫冊



複磴摩雲起丹梯入望懸殘林寒野照飛瀑挂晴天虛  
閣孤雲度遙山暮靄連苔紋滋徑滑蘿翠滴衣鮮採藥  
歸玄圃餐芝卧紫煙未能追雅躅空自歎塵緣

許國

杏花春燕應制

常隨春社至偏向上林飛亂掠輕紅過頻穿積翠圍芹  
泥堪采掇花雨正霏微幸得巢金屋毋令點玉衣雕梁  
時自語綺戶靜相依披對思瓊苑當年賜宴歸

玉溜泉

水石淨娟娟殊方有洞天山開一竇小泉散亂珠懸味  
出雲根冷光含露蕊鮮泠泠飄素玉灑灑韻朱絃膏澤  
翳荒谷朝宗委大川奈茲阻窮僻何以效微涓漱潤窺  
丹罇尋源倚翠巔竹瓢分乳液松鼎起茶煙馬上餘幽  
響瑤琴為爾傳

林如楚

夏晚寓直同費郎中

鴉啼省樹深畫館肅清陰案牘欣多暇丹鉛得共尋  
花紅近砌藤蔓綠依林野鶴歸孤夢閒雲長道心開軒  
涼氣引卷幌月華臨邛曼官仍薄潘安鬢欲侵朱絃時  
一奏感激為知音

皇甫湜

過維揚作

念昔恭明祀三秋滯楚鄉今來還上國五月渡維揚  
戀土情何極瞻塗意轉長川原歷迢遞煙樹引微茫浴渚

飛鳥下驚沙白鷺翔江隅有芳草幽思獨難忘

淮陽

海畔淮陽郡風煙奈此何客心自容與湖上幾經過驛  
岸丹楓少人家綠樹多雲帆朝見市津火夜聞歌城郭  
連鴻雁江山映綺羅寒潮正相待歸興滿滄波

皇甫汈

夏至日天子有事於方丘小臣太學齋居作

鳳甸方丘峙龍輿大駕來赤旂承烈日碧殿淨氛埃天

上帷城建雲中幔屋開喜瞻周祀典忝竊漢英材暑謝  
唐文避薰應虞舜催明禋宣室裏徒倚泮宮隈繒燎光  
仍焰咸池舞更迴自非留滯客徒愴失趨陪

冬日遊虎丘

故國殘冬返名山暇日遊攀蘿尋舊徑倚樹眺新樓洞  
雪寒能積巖泉淨不流虎將金界湧龍抱劒光浮客向  
空門散僧開慧室留已堪招白社何必訪丹丘

題高行人使琉球卷

奉使彤庭上頌封碧海隅  
天池凌浩渺星漢挂虛無  
雲日龍宮幻風霆蛟壑呼  
扶桑標外域嘉樹在方壺  
綏化遐難極論思蕩不殊  
波臣承玉冊水伯護金符  
采秀三山近乘槎萬里孤  
即思枚氏發因頌禹王圖

聞劉子威還自洛陽奉簡

別記殷秋日歸當聿暮  
時枚生游似倦陶令去嫌遲  
試問山川勝聊陳風土宜  
銅臺經故寢金谷展荒祠  
潘縣猶花發梁園但黍離  
鬢先凋作素衣盡化為緇  
余抱傷

弓恨君遭按劔疑因聲附張那久宦欲何為

馮惟健

送少宗伯東渚楊公還朝

舟楫懷明主笙歌慰遠徵蒲輪暉泰岱龍節照淄澠日  
月丹霄迴蓬萊絳闕層上台旋斗極東海運鵬鵬虞室  
夔龍重周廷禮樂興銀臺閒玉甌天閣祕金縢九廟旂  
常集諸陵劔舄登鮒隅祥霧隱豐沛瑞源澄金粟雙峰  
並瑤池八駿乘臣鄰瞻赫赫賓從盡兢兢獻納當朝望

都俞氣象增殊儀須景伯正色待長升綬扇隨車轉朱  
明麗蓋昇松亭餘舞鶴石巘按垂藤地迴雲光瑩天齊  
雨氣蒸歌隨林鳥變思共暮煙凝牛角悲歌甯龍門喜  
御膺十年還戴鵠千里共擔簦勲業寧金馬身名豈玉  
繩塵鋒頻自拭鍛翮尚堪騰敢謂吟梁甫誰能著茂陵  
雲門讀書處日暮倚峻嶒

何良俊

送馮侍御謫戍雷州



海上孤城迴春深瘴癘屯抗言憐直道涉險向南奔暗  
損辭家貌頻驚去國魂長沙悲賈誼粵徼滯虞翻異代  
俱傷鵬清時獨聽猿嶺雲低古戍蠻日慘寒原路傍湘  
娥竹溪逢楚客蓀窮荒傳諫草翰海接詞源直跨蘓公  
壘卑看寇氏垣他鄉多勝事遠道亦何論

李攀龍

答謝生盤山詩

愛爾躋攀處奇蹤滿報章山盤元氣出寺抱翠微藏拂

石搖天影披花帶雨香千峰回白首萬壑步清霜鼓角  
榆關墮旌旗塞草長陰風來大漠秋日下漁陽海色秦  
城外邊聲漢苑旁欲因臨望代遂得紀金湯

與子與游靈隱寺吳馬諸公同賦

片雨過龍吟清風肅虎林海浮西域至江插洞天深小  
嶺將遙集名山豈陸沉地靈聞水樂岫隱見雲心金粟  
寒應結香爐迴自陰藤蘿窳窳臺殿倚蕭森石笋高  
搖筆蓮花淨盃簪何須還謝客俱解越中吟

王世貞

游石湖登上方寺

客語上方勝藤蘿手自攀歸雲初半塔過雨忽分山掩  
冉開青鏡參差列翠鬟苔衣沾步履柏子落禪關自喜  
長年慢猶慚老宿閒鳥還應已暮未肯下人間

富陽至桐廬道中

揚舲溯流上秋色競紛紛翠荇波仍繡丹楓壁自文路  
疑千嶺盡山為一江分夕照高低出灘聲遠近聞薜衣

過木客椒酒問桐君欲叩幽棲意峰峰多白雲

謝榛

庚戌八月二十二日恭聞奉天殿視朝

上苑涼颼起西山瑞靄濃玉珂天漢路金闕午時鐘  
劍佩鑪香近旌旗日影重宮牆落楊柳水檻出芙蓉萬舞  
趨丹鳳千官識袞龍遙傳北伐詔光耀紫泥封

初春夜集王元美宅餞別吳峻伯徐汝思袁履  
善三比部出使得孟字

共餞江南客芳筵候月來漏催詩草就春報燭花開把  
袂終千里論心更一盃風人今夜聚星使幾時回官舍  
遙聞笛宮庭暗落梅相看倍惆悵殘雪照燕臺

宗臣

同茂秦于鱗南溪泛舟

昔賢悲曲水今日俯長河路險難車馬橋荒先薜蘿亂  
青來澗草新綠散萼荷千嶂尊中落孤槎天上過醉餘  
燕市酒狂識楚人歌鴻雁飛何急琵琶恨自多雲留仙

客履日落野漁蓑風雨蕭然至吾如幽思何

徐中行

同張肖甫送迺兄山人還蜀

兄弟金臺別依依玉樹柯鳴琴悽蜀調把酒醉燕歌  
曉騎停楊柳春衣換薜蘿回車赤岸近卧閣白雲多月  
度峨嵋夜花飛錦水波著書藏小酉種藥滿中阿風物  
三巴盡蓬蒿二仲過他時登海嶠莫惜示羊何

吳國倫

流河驛晚眺

日落江光隱沙寒雨氣侵長天送遠目去鳥促歸心楓  
葉早霜下芙蓉秋水深賈帆飛樹杪漁網集亭陰鷗狎  
中流楫鷁栖隔浦林涼颺起高樹一為爽煩襟

送姜太史節之使楚王

天子分桐葉詞臣下柏梁共憐星是使况乃玉為堂江  
漢環宗國風雲護帝鄉居人思過沛太史復浮湘地險  
東南勝藩盟帶礪長晴山開絳節高浪出牙樯六傳中

原路雙鋒北斗旁  
緘書如有意歸雁自衡陽

汪道會

同焦澹園太史北園看梅分韻

東風吹苑樹先到北城梅  
積素全凝雪繁英半拂苔  
佳辰追上客幽興引深杯  
地接祗園近尊移竹嶼開  
一枝橫老榦片玉覆香臺  
花似諸天散人疑向月來  
坐憐山色暮寒怨笛聲催  
歸路埃塵滿清芬首重回

張九一



送子藩李勲部歸南海

霞色金門曙微風錦纜牽樓船開大漠灘瀨倒長天折  
柳沾宮雨收帆捲塞煙山平齊野出河盡漢江連作賦  
蕪城暮懷人桂水懸荷衣裁夏渚藥裏洗春泉樹入津  
亭斷雲從石竇穿衆人競紫綬斯道付朱絃雅頌余甘  
後薜蘿爾獨先南溟千頃月到日自應圓

李先芳

羅溪驛

驛路臨江渚，秋山碧四圍。  
澹煙兩岸靜，落日一帆微。  
歲歇草蟲亂，天晴水鶴飛。  
東原橘柚熟，西堰稻粱肥。  
霜換青楓樹，苔沈白石磯。  
我將乘畫舫，相伴暮潮歸。

吳維嶽

審錄江右李于鱗謝茂秦集王元美宅相餞分  
得中字

宣恩充節使，設餞枉詞工。  
漫秉當筵燭，初聞出塞鴻。  
夜鐘山雨後，春漏苑花中。  
別思朱絃急，雄譚綠蟻空。  
放舟

前路遠戀闕此心同若是逢梅樹傳書候曉風

魏允中

王別駕招飲晚香堂同謝茂秦朱堯治二山人  
分韻得心字

節事重陽美秋光別館深吏人回小徑風日澹疎林杖  
過苔分潤筵開樹拂陰朋來半萍水坐上幾冠簪漫說  
白衣送還矜綵筆吟竹煙生窈窕花露滴蕭森清緩幽  
人駕涼披傲吏襟曲終雲總遏樽改月頻沈人代遙連

古風流妙屬今醉來拈菊蕊悽惻後時心

徐獻忠

贈四鐵御史馮南江還里

直道人間頌幽囚聖主憐但須寬一死不惜成窮邊  
慈母思張讌吾人願執鞭聲華輝宇宙嶂海淨雲煙國是  
歸輿論皇圖合萬年百憂聊自解四鐵總堪傳

王鏞

送大行謝驛梅使琉球

使節分星象仙舟捧御函絲綸宣海嶽天地極東南服  
荷殊宣賜才推絕域堪遠人胥樂附異俗乃能諳父老  
相如檄詩書陸賈談徵牢宵逾十館穀日過三牛馬風  
何隔金銀氣不貪兩階遐格舜九扈乍聞郊專對名非  
忝周咨迹豈慚歸航應載石赴闕及傳柑國體從茲振  
兵威不自戡梅花洋信近延佇慰朋簪

沈明臣

茲遊

山水平生願茲遊亦偶逢溪清石五色山轉路千重片  
雨孤峰入餘霞衆壑濃灘聲風浩浩花氣草茸茸波動  
將崩石雲浮不盡松瀨船牽月上水碓雜雲春宿傍魚  
龍窟行隨虎豹蹤同行攜鄭老日遣畫芙蓉

周詩

白谿篇為吳子賦

採秀深谿止高人思不窮仙巖迴合裏靈壑杳茫中震  
澤餘霞接松陵曲墅通夕沙流素月秋水逗賓鴻花色

彌霜鏡漁歌遞遠空一舟沿泛處蕭灑更誰同

王穉登

七十初度漫賦二十六韻

憶上蓬萊殿曾讎石室書史臣陪出入丞相借吹噓故  
國歸來早長安不可居為園棲曲巷種柳拂清渠西縣  
琴聲近南鄰樹影疎庭馴得食鳥池躍放生魚抱膝吟  
梁父無心賦子虛鄙人荆五穀醒士楚三閭白鳥相忘  
久青蠅肯舍諸淺衷同撲滿傲骨類籋簪漢紀偷桃舊

幽風剥棗初秋山當几席春酒滿園廬大斗勞為壽新  
詩賴起予自慚同襪線何以報璫璣浚邑干旄騎燉煌  
鐘鼓車高僧遺巾拂名妓進衣袵丹指楓將變黃知菊  
漸舒何當饗敝帚不可賴耕鋤花落從堆積雲來不掃  
除每開池上酌頻摘雨中蔬王猛貧捫蝨公孫老牧豬  
隕霜嗟獄氣蔽日憤刑餘殿上誰扳檻屏前罷引裾終  
朝遊汗漫豈但夢華胥中聖曾無計求仙焉所如桃花  
流水渡願作武陵漁




陸俸

至陽山訪岳山人

訪爾陽山曲迢迢丘壑重青冥  
恣遐矚麋鹿伴孤蹤高枕低雲  
嶠踈林度遠鐘徑餘重九菊門倚  
兩三松避地霧中隱鳴琴竹下逢  
夜長思共醉老去願相從魏闕無  
令想仙風自可宗因思沉湎者役  
役爾何庸



御選明詩卷九十三



總校官庶吉士臣侍朝

校對官編修臣莫瞻菴

謄錄監生臣和其聲

欽定四庫全書薈要

集部

御選明詩卷九十四

詳校官原任主事<sub>臣</sub>李斯咏

欽定四庫全書薈要卷一萬八千五百九十四集部

御選明詩卷九十四

五言長律三

黃鳳翔

秋聲

新秋涼似洗噫氣發清商  
木落空山月鳥啼永夜霜  
斷雲喧故鴈零露泣寒螿  
戍角三城外閨砧一水傍  
天高聲更遠院寂聽偏長  
悄悄悲秋客徘徊正倚牀



蟋蟀

莎雞閒振羽  
野外作秋聲  
為怯霜前冷  
翻從屋角鳴  
隨風喧古壁  
帶月度虛楹  
影向簷燈近  
音飄砌葉輕  
幽閨機上怨  
孤館客邊情  
夜靜吟偏切  
更闌夢不成

李維禎

曹允寧水部心遠齋

方丈端居室  
悠然與世違  
清香凝座滿  
俗駕到門稀  
嶽色遙當戶  
京塵不染衣  
放歌啼鳥和  
對酒落花飛  
日涉

閒成趣天游思入微雲霞邀翰墨山水寄音徽謾謾風  
鳴籟溶溶月鑒幃會心寧在遠吾亦憺忘歸

沈一貫

登金山寺

寶界凝三島瑤臺絕四鄉江心懸法鏡渡口出慈航塔  
鎮龍王藏龕依鴈子堂濺濤銷畫彩隱岫濕爐香夜榜  
投僧火春帆引佛光已聞潮是梵寧指蜃為梁咒食靈  
龜喜齋心老檣涼望來炎暑薄歌罷海天蒼素愛中冷

水兼依大法王誓當滌塵袂高臥片雲長

沈位

十二月二十一日獻俘

睿德通中夏天威震北隅遐方歸正朔款塞獻新俘清  
廟陳弘業彤庭顯秘圖五兵原不戰巨寇已行誅將相  
多酬賞寰區盡大酺小臣叨侍從率武詠神謨

黃洪憲

別許都監



萍水他鄉聚多君，傾蓋懽九秋。  
迎使節千里，送征鞍久客。  
歸心切，孤亭別袂，寒遠星江上。  
落殘月，馬頭看，豈不懷瓊玖。  
無因託羽翰，相思不得見，努力且加餐。

馮時可

玄墓夜宿同圓上人

木葉猶未落，洞庭水濺濺。  
空林上新月，野寺如秋天。  
清梵流山壑，幽琴和澗泉。  
僧道迷翠靄，人語出蒼煙。  
蘭燄招蟲逗，松飈警鶴眠。  
焚檀相佞佛，拂麈互談禪。  
薄味為

靈藥無生是大年  
廓然那有聖深悔  
滯蹄筌

過六和寺懷蓮池上人

只疑山徑盡  
展轉見禪宮  
吳越分疆異  
齊梁建宇空  
鳥聲頻喚雨  
虎嘯屢呼風  
草細春猶淺  
花稀暖未融  
江波侵去騎  
嵩采映垂虹  
于役不遑息  
何因見遠公

張比部席間咏青青河畔柳

窈窕長安柳  
參差河水濱  
波光羞比綠  
草色怯爭新  
細縷臨流濯  
纖眉對鏡顰  
霞酣張緒態  
風約小蠻身  
不數

章臺暮空疑灞岸春離人正多恨羌笛莫教頻

送鄭總督之鎮

聖主自垂裳猶懷御遠方月卿臨馬邑星使下龍荒地  
控諸闕壯天連萬堞長慇懃宣廟略翕習動軍裝五利  
和戎策千言實塞章白題迎節舞紫燕傍車昂鈴閣秋  
聲靜油幢晚氣涼邊沙看盡埽朝野倚金湯

李應徵

舟中眺雪

俯仰迷江甸東南凍未蘇扁舟下遠水積雪斷寒蕪朔  
氣連滄海窮陰混太湖瀟瀟兼霰密脈脈受風扶大地  
遙浮越低空近壓吳山川紛莽蒼雲木半虛無鴈路纔  
分影鷗沙祇辨呼戢鱗潛素鯉側目逗飢鳥色借齊宮  
並音操郢曲孤披來朝練淨映處夜珠枯不用裁梁賦  
偏宜入剡圖乍驚容鬢似却怪歲華徂臘漸回杓斗春  
先到酒壚乾坤原浩蕩泥滓暫崎嶇自笑寒暄態誰燃  
造化鑪聖朝陽德在白日麗高衢

鄒元標

中秋夜宿玄潭江上

三五良宵好澄江一水平月華欺淺嶼零落點浮萍白  
白兼流湧垂垂帶樹橫邨砧淒古渡燈火伴孤檠字閃  
冥鴻過蟲驚腐草鳴滄浪今幾夕曠野百年情高閣凌  
霄靄危巖切太清松聲秋萬壑人擬到蓬瀛

馮大受

秋日郊園

景物郊園勝芳原引興長高談開曲宴雅奏發清商  
叢菊籬邊色芙蓉水面妝荷衣辭故綠柳帶變初黃  
晚照莓苔徑秋陰薜荔牆泉聲經竹塢霞彩散林塘  
踞石呼毛穎臨流泛羽觴文人騁妙說飛翰即成章

善卷

問道尋無著探奇到善卷高名自堯世古剎創唐年  
柱有雷文在亭因偃柏傳攀蘿循磴仄轉徑選幽偏  
玉室疑留藏金堂似昔緣有山皆露骨無地不飛泉  
燎火深

逾耿懸崖滴欲穿洞中垂玉乳地底插青蓮  
窈窕還藏壑崆峒忽有天會當餐石髓莫漫學嵇仙

余寅

侍司馬公發曠晦至茂嶼十六韻

遵渚有餘清看人白鳥明遙分平野色乍入大江聲  
旋空濛失嶷嶷積翠生短檣皆岸立老鸛逐陂行進艇  
枯河涇扶筇絕巘輕危巖駢別樹神瀆墮前楹日月頻  
揮擲山川暫合并雙眸凝不極一嘯意難平壯志聽鷗

鳩高懷訊杜蘅交情多險巇世事太縱橫珍重鮪魚膾  
尋常竹笋羹奕過天再旦睡到日西傾有地恣幽討無  
時解宿醒乾雲栖老石苦霧羃荒坪萬慮緣於俗千年  
好是名滄洲鷗鷺在敢悞舊時盟

朱國祚

頌歷恭紀

閭門開曉日玉律下雲邊一紀逢羲馭千秋卜漢年靈  
臺占氣早上苑得春偏瑞靄含蓂莢懽呼雜管絃三辰



傳夏令萬國戴堯天欲進昇平頌慚無白雪篇

太學釋奠同郭美命行分獻禮畢周覽橋門石  
鼓歸塗成二十韻

上丁遲日麗咸秩雍先釋奠周官禮安歌魯國絃質  
明期敢後分獻典宜虔宿鳥初離樹殘星尚在天百夫  
趨陛戟萬舞列宮懸次第陳犧象從容執豆籩班居元  
老次位近素王偏十子升堂舊千春配享專循階登降  
數薦帛節文全小大從於邁東西互折旋黃流纔灌地

朱燎已生煙畢奏咸和曲徐收廣殿筵更衣辭鷺序散  
昨得羊肩坦步橋門外偕行獵碣邊形模度科白歲月  
昧成宣已免風霜剥無愁鐘簾遷四詩雖絳漏終古自  
流傳坐久趁松日歸來並杏韉協恭良不易同調最相  
憐好琢燕山石題名廟學孺

朱長春

載酒餘不溪攜客道場山改席歸雲菴迴船碧

浪湖

溪盤遊徑曲山引放船清白屋鶯啼曙平臯麥秀晴絲  
縈風裊裊花炫日盈盈兩屐登厓迴雙柑坐石平暖沙  
邀拾翠香礪逗吹笙社燕避人舞樵童領客行幽探過  
野寺携酌對春畊肅以林嵐景泠然山水聲冶遊迷落  
日餘醉緩歸程薄暮芳洲上褰裳采杜蘅

方應選

辛卯元日

惠風開獻歲旭日起層霄客邸頻簪柏王春正轉杓看

山青落潁醺酒碧浮椒擁雪翻新歷攀梅憶去朝遐蹤  
聊自寄俠氣未全銷吏隱耽殘蠹官寒撫敝貂斗間龍  
劒動天外鴈書迢入洛名非陸歌衢路是堯但能寬宥  
肘寧敢愛潛腰到處堪攜鶴何枝可息鷯占年饒雨露  
訪道問漁樵萬木琴中調三花舄上飄焚香遲白晝刻  
燭賦清宵我已齊喧寂何須厭世囂

湯顯祖

初發瑤湖次宿广溪

病瘦那臨鏡清虛欲衣綿春糧三月外伏枕一秋偏吉  
日將行色殊方或勝緣暑過新雨薄氣逐晚雲鮮堂上  
行猶怯窗低寢似便命飄危葉起淚濕死灰然君子能  
無瘡良醫幸有全月窗推藥杵雲戶隱書箋氣弱難扶  
餞裝輕得漾船斑斕垂地泣蔥鬱舊塋憐故故隨搖曳  
悠悠獨遡沿金隄斜照落瑤水暮風旋客夢初移枕勞  
歌始扣舷外家依子下中國向窮邊盱贛江連峽雷瓊  
海隔天滄浪誰莞爾岐路欲潛然星謫郎官遠心知宅

相賢賦詩耆舊引樽酒樂人傳鳩祝人難老鵬扶尉欲  
仙山川彌望積丘壑幾時專

秋日西池望二仙橋

池上映秋光登臨愛夕陽鏡中蒲柳色衣上芰荷香聽  
雨初留屐當風一據牀猗蘭延客語高菊以鄰芳紫翠  
連山暝晴陰隔水涼坐看人世小仙馭白雲鄉

相圃新成十韻示諸生

禮樂在平昌諸生立射堂山形君子似地脈聖人傍四

獸風雲合三龜日月良天門馳直道星舍翼迴廊半壁  
新泉煖成惟舊木蒼嘗聞殷曰序如見孔之牆遠意桑  
蓬色清歌蘋藻香修容隨抗耦射策擬穿楊有鵠求臣  
子為侯應帝王同科非爾力得雋乃吾祥

袁宗道

送邵芝南太史冊封唐藩

暫輟編摩去行行入豫疆驅車遊宛洛立馬問韓梁雨  
洗沙溪淨風傳路草香雲霞添旅橐花鳥貯吟囊白水

秋澄徹丹山夜鬱蒼剪桐分帝子酌醴醉仙郎泛酒思  
文叔登臺憶武鄉民艱今可問何似昔南陽

袁宏道

旃檀館雨中限十一韻

臥觀殘帖蠹閒撥冷池灰洗碗供梨汁分壚炙芋魁雉  
斑穿砌笋兔目長宮槐謝草吟三復支堂看幾迴思深  
泉透石吟苦將銜枚敝冊膠春鹵花箋汙曉煤鳩飛頻  
帶子鳩雨不通媒種藥愁沙澀增欄直岸頽茜衫官長



過小服野人推木壁塗番像丹房裂淨苔松菁欲放滿  
自起斲旁萊

王嘉謨

余司隸本甫昆仲共集薛衛尉園亭池上作

畫戟森前列鳴珂集上闌渚宮圻城畔翠幄敞庭端緹  
騎明村落簪纓映樹檀靈源二潞瀉空翠九門寒花鳥  
春將晚山川雪後看席移時藉草觴薦半調蘭選勝何  
須遠興言自可歡淒清鳴澗壑掩映白衣冠日永宜酣

暢人幽信曠觀會心還自失寂寞獨憑欄

沈瓚

夏省齋居

時將有事於方澤

幸屬尚書省言隨司馬郎韜鈴存上策俎豆肅初將故  
事湮方澤新恩逮末行黃琮朝獻瑞粉署夜凝霜寓直  
參帷幄樞趨近袞裳齋心時聽氣陳力敢乖方身作長  
城許名慙尺蠖藏微衷期格帝賤吏亦從王拄笏迎西  
爽含疏憶舊裝競傳雲漢詠恐負蓼蕭章多壘非今日

無祈信彼蒼皇心  
迓天眷降福自穰穰

徐燭

賦得深閨秋織

深閨秋色早中婦倚流黃寒杼傳聲切  
殘絲結縷長壁間聞促織錦上見鴛鴦  
斷綆金刀疾拋梭玉釧忙芙蓉叢出朶  
蓮子簇依房緯密經雙引文迴字幾行  
捲縑纏別緒移軸轉離腸窗外烏啼夜  
簾前鴈帶霜愁魂縈綺縠清淚滴縹緗  
星斗斜將盡支機動未央張彊乘月影

完匹續燈光寶女思千里天仙妒七襄莫辭閨力苦邊  
塞待衣裳

焦竑

松麓山房聽雨得連字

春陰遊寶地襟袖攪霏煙雨合千峰徧雲屯一壑偏冥  
濛驚色暗滴漉訝聲連檐樹寒逾翠江梅濕欲然林空  
羣籟息門掩一燈懸徑斷翻增勝觴飛不礙禪祇疑人  
世裏別有淨居天

黃輝

襄陽隆中四十四韻

斬蛟寒浦外何處臥龍岑亂世燕齊事高人管樂心隆  
中山故闔漢上日偏沈魚水應奇會蝸廬耐數尋乾坤  
交顧盼雷雨動蕭森感激輕強弱營綜妙古今鷹揚師  
盡躍虎視敵全瘖王略無偏正天威有縱禽雄圖文武  
略密計鬼神臨糾合忘殘局艱危失斷金屯田判不退  
按堵了無侵風送迴旗影星疎冷劒鐔木牛機少洩巾

惆悵猶任多壘揮戈氣秋原別主忱三分寧夙畫二表  
自餘音宇宙綸巾老山河陣蕝沉荆梁寒色迴宛雒亂  
流深苔色還遺井松聲豈故林短茅存露井疊劔引霜  
碁寂寞軍前淚虛無世外琴筆籌空簡策羽扇奈氛祲  
執御甘相屬沾書共欲禁水流深感歲雲出詎為霖撫  
稻思圭里看桃愴蕩陰英雄俱往跡歎息此彌襟想像  
躬耕罷歸來抱膝吟

吳正志

暮春邀諸僚友署中賞牡丹

名花經雨露同舍各憐香歲月移根舊鳩曹勝會常當  
軒繁似錦孤本燦成章競秀枝頭重含羞葉底藏姿偏  
歌臉媚瓣簇捧心昂絳雪飄仙羽丹霞爛曉光無欄雲  
欲護帶粉玉為妝媚媚隨風舞紛紛惹蝶忙容華真絕  
代窈窕失同行故殿羣葩後翻專衆美場鼠姑原屬草  
鹿韭亦為糧未必延州產疑分洛下芳吾猶尋種貴人  
已擬花王獨步顏微笑偕來客引觴同心葭半倚聚樂

幕高張點筆神俱炫傳籌興更狂禮忘先後輩人自水  
雲鄉有約傾醺醑何須問鵲鷁嘉賓歡雜沓小吏並趨  
蹌投轄情匪誕留髡宴未央樹陰交映碧鳥語間成簧  
日落猶停騎春歸欲斷腸明朝了公事好共檢詩囊

丁肇亨

越卓凡招飲高座寺登看竹軒松風閣同席者  
鍾伯敬馬瑤草賀斗虛李新宇乘月而歸

高座隱山岑千層樓閣深銜盃同覽勝說劒復成吟竹



影連苔色松聲和鳥音亂花迎面舞飛蝶趁風侵屈曲  
通幽徑逶迤入茂林沉酣猶未已蘿月滿衣襟

鄭明選

獻縣懷古

漢代賢王子風流獻縣存遺書千載散雅樂幾人論墓  
道松楸古祠堂俎豆尊故宮迷草色殘碣鎖苔痕鴈鶩  
浮河水風沙暗郭門行行一回首煙月度黃昏

謝肇淛

安平署中述懷五十六韻

丘壑元吾好風塵力未勝漫言金馬隱翻作土牛乘賜  
履三河遠封章六郡承幸無官長罵時有簿書仍地重  
飛艘集曹閒老吏能抱河城似玦臨水署為冰北極通  
幽薊南流控魯滕穆陵齊地壯淮甸楚天澄畚鍤冬還  
舉杭秣歲屢騰郵籤妨午夢官舫促晨興面目隨人改  
文章避世稱寧知貧是病轉覺愛為憎旅食愁新況離  
羣憶舊朋彈碁時映竹開卷夜挑燈方外忘年友山中

結夏僧露華紅擘荔水水綠翻菱逐電青絲騎排雲白  
角鷹胡姬春釀壓趙女晚妝凝寶帶鳴條脫銀牀織毼  
毼夢迴香爇篆歌闋月藏稜玉笛吹橫塞琬弧走射墉  
鄰多窺宋玉酒或送王弘伏劒經吳苑觀濤過廣陵名  
山皆蠟屐絕壑獨擔簦象闕通瑤極燕山應玉繩雲衢  
隨地望天路得階升蜩鸞飛將奮駑駘價亦增詞猶慙  
色絹宴已預紅綾捧日心常繫從雲氣倍蒸詎知鷓鴣  
侶便隔鹿麋層綬忝郎官貴茵均刺史憑分符行郡國

簞羽後農丞未學操刀割彌深捧玉兢雲霄霜翮勁象  
緯彩毫凌但欲深懷瑾何知遠避矰風雲變蒼狗天地  
亂青蠅萋菲終安用蹉跎亦自應積薪甘似汲投杼更  
疑曾舉世羞駢指何人問折肱沙蟲吹未了塞馬失何  
曾白眼終難變紅顏轉自矜擬拋雞肋去勉就鶴書徵  
冀北千金駿圖南六月鵬寒流河漢漾秋色岱峻嶒北  
郭竽長濫東山屐再登無勞沈璧馬祇借費金縢健恐  
薪垂盡沙防岸善崩桃花無怒浪瓠子有荒塍樓迴隨

雲度亭虛任月昇榜師聲欵乃稚子髮鬢髻蟻穴容周  
弁龍門媿李膺全身看奕局守口固緘滕宿鳥知驚彈  
傷魚已遠冒鴻心元矯矯蟲羽故翩翩趨舍寧無定升  
沉固不恒長歌聊自適休弔刺溪藤

陳薦夫

團扇承落花

宮扇偃輕羅宮花墮玉柯偶持迎絳雪詎遣雜青莎帶  
露疑揮汗沾朱似障歌陣香風處逗片影月中過白為

叢深損紅因坐久多殘英兼舊寵相戀恨如何

黃汝亨

游焦山

未照流晴豔長風薄暮潮山藏江寺古林引海門遥露  
氣通丹井雲根長藥苗鶴書豐草護鰲背祕巖超靈境  
真無匹仙人不可招倏然遺世想萬籟寂松寥

孫谷

橫溪凡幾度別是一林幽崖斷憑橋合泉寒帶雨流舊

龕沉佛火新竹護書樓  
支許人俱往烟霞氣自投  
片陰堪結夏高樹颯含秋  
便欲懸雙屐還為勝地留

熊明遇

江渚即事

寒輕江渚碧烟滿市樓  
青打鼓船開岸鳴榔鶴起汀  
遠村交老樹芳草藉新亭  
漁子將竿挂舟人把柁停  
澄空飛白鷺浮靄隱蜻蜓  
晚對西山好嵐光作畫屏

張翥

賦得草色遙看近却無

和風吹麗景碧草動春暉  
黛淺分苔砌煙輕薄蕙幃浮  
香疑入夢澹影欲侵衣  
雨過迴塘杳雲深曲徑微  
王孫池上綠塞客隴頭菲  
相浥疑相望萋萋意不違

題王光祿公觀南園二十韻

古堞臨平圃城南小有天  
狎鷗新築社飲馬舊開泉  
竹徑疎疎影花蹊細細煙  
遊蜂先得路乳燕正歸椽  
戶攬西山爽堂宜北海筵  
松濤日風雨梧井夜蟬娟  
靈榭紺



宮闕梵鈴畫閣懸峰灣迷洞口牆短出山巔亭聳孤巖  
峙橋通曲水連一簾捲紅雨半衲坐青蓮梅蕊方舒雪  
楊枝又散綿遠風翻柳浪平水布荷錢桂樹堪招飲竹  
林可對賢迴廊初得句丈室且逃禪鳬渚浮花瓣漁磯  
應釣船鷗忘機不動鹿野性彌堅幻影成何事浮名空  
自煎菟裘爾有主邁軸吾隨緣

楊鶴

春日遊百泉王信卿留酌賦別

碧澗千堆雪蒼煙九疊屏山光垂倒幔潭影落空青雲  
壑丘中賞巖泉靜者聽一泓秋瑟瑟三峽水泠泠噴沫  
驚風雨迴波射日星浪花穿地肺海眼洞幽冥石髮摩  
尼色溪毛翡翠翎綠宜盛玉盃白好瀉銀瓶香汎共城  
稻清浮竹葉醺禪心參水觀韻事補茶經鳬舄憐王子  
烏衣舊典型倉皇呼雀舫造次出侯鯖投轄肝腸見懸  
河舌本靈坐欽陪野服歌管動吳伶執手愁輕別牽裾  
酒不停驪駒歸路暝燈火照熒熒

程嘉璣

九日既望次瑞卿惜別詩

逢君春向暮相送忽深秋  
長夏無蟬噪高天極鳥投  
閒階松葉碧空院菊花留  
曉月臨山驛寒風滿縣樓  
人行落木成馬識渡河愁  
不謂平生淚還因別思流

錢龍錫

題幽風七月圖

國本民生繫深思草昧存淳風  
懷瑾戶美俗寫朋尊卜

洛從何始承卽信有源艱難開聖主告誡切文孫拭目  
丹青麗賡歌雅什溫思隨工瞽誦欣望闕虞門

鍾惺

溪晚

浩渺秋難望平林但遠煙山楓紅隔寺谿水碧連船寒  
犬喧疎店驚鴉亂晚天僧歸殘雨外笛散夕陽邊幽思  
宜孤往高情多所捐不知吟眺後何事亦淒然

舟晚

舟樓頻易處水宿偶依岑岸暝江逾遠天寒谷自深隔  
墟煙似曉近峽氣先陰初月難離霧疎燈稍著林漁樵  
昏後語山水靜中音莫數歸鴉翼徒驚倦客心

楊嗣昌

飲龍君御先生憑園賦謝短章兼致蓴菜

白葉開摩詰黃冠訪季真路尋三徑遠情共一丘親翳  
水搖輕楫臨風整角巾人從今御李家是舊逃秦發口  
言無雜掀髯笑欲頻入山魚得水狎渚鳥依人坐即捫

經筵行如遇石困自嘗題偃骨誰擬戲修唇著史閒追  
陸填詞偶效辛喉隨車子轉聽與雪兒新忽漫來飛雨  
因之浣素塵一聲喧小海兩槳薦長津繞閣風無定窺  
簷氣欲勻舉杯當石面開扇拂雲鱗醴酒荆王設葡萄  
魏帝珍傾筐寧款謝投轄似過陳謔異鄱陽暴歌同郢  
里春門生行適越太史故居鄧賤子懷鉛裔功曹入幕  
賓已都無白眼何必有青筠客次眠元亮神前醉伯倫  
一龍真矯矯三狗漫狺狺七里行邊瀨千巖畫裏身雲

煙揮在手鐘鼓聽非鄰  
洗鉢如容我書裙會有因  
勉羞  
禪悅味蘭澤米芳蓴

萬燦

三月三日同諸友飲江亭

三月風光好蘭亭事莫違  
觴隨流水轉思逐落花飛  
水鳥沈波沒山雞掠岸歸  
遊人沾柳絮江女浣春衣  
輕鷁穿洄澗斜陽下釣磯  
相歡追袂襖入市掩柴扉

黃尊素

周玉汝年兄招飲郊外梁昭明廟

積雨纔生霽郊前士女稀相將斗酒去往看綠陰肥廟  
古猶餘像僧閒自采薇冠纓且暫解棋酒動相依遠鳥  
啼春晚孤枝映夕輝久濡人事理那識歲華飛

盛時泰

偶然作

酒醒聞雨響況復在山村木葉知時序雞聲識曉昏七  
絃頻寄興二畝足為園清淨元無字逍遙賸有言未能



離世網聊且寄丘樊白足人為侶玄同道作門茅茨臨  
谷口烟火出雲根為報陶弘景何時辭帝閭

俞安期

謁禹陵

水土開荒服憂勤任聖躬八年忘內顧四載畢前功  
歷數虞咨及巡游夏諺同會稽臨絕徼道里記方中  
玉帛諸侯集梯航萬國通重輝扶舜日後至戮防風  
論德人無間傳家祚莫終寢園非遠隧祠廟異卑宮  
祭本天酬

孝民猶俗尚忠穴深藏詭物石立寔神工祕守玄扃使  
奇探太史公為魚心感歎酌水意尊榮草莽成臣禮精  
靈鑒鄙衷願為松柏樹朝暮護青蔥

王嗣經

郊游

禁樹青郊外重城綠水湄園林春閨月花鳥晝晴時遠  
岫平浮檻清泉曲到池晚紅私蛺蝶新綠逐黃鸝煙斷  
游絲見風輕落絮知一陂芳草色禁得馬蹄遲

送曹能始還閩中分賦得李白詩湖清霜鏡曉  
歸客金陵道霜帆夢鏡湖秋水衣斂海曙日輪孤幔  
卷波紋縠舟凌露藻珠潮平光稍白風定浪還無清映  
冰花薄澄涵錦樹鋪鳥來分水碧人去亂汀菰賀監風  
流在臨風酌一觚

邵正魁

觀太學石鼓

十鼓千秋石橋門列儼然功應昭羽獵世得紀成宣想

像于岐日寧論入洛年法書存斷畫大雅在殘篇色起  
雲霞絢光爭日月懸依櫺星自聚照水壁猶聯呵護諸  
生重臨摹博士專長同夢樂典豈羨漢經傳後作知難  
及他山可罷鐫子雲徒曉事白首獻甘泉

汪元范

寄邢子愿三十韻

自作西京客深嗟阻舊遊涼風生遠道景色入清秋董  
澤蒲先脆樊川菊正稠潦收鷓鴣警露霜落鴈環洲積氣

垆邊合寒煙木末流夷猶頻出郭蕭瑟一登樓轉切懷  
人思寧銷去國憂眼穿臨渭汭神越繞齊州憶過坊城  
畔尋君泚水頭授餐存繾綣下榻媿淹留蓬徑要真隱  
瓜畦學故侯避喧敬阜帽抗世擁羊裘側目羣公忌修  
容衆女讐扶搖矜鸚雀馳騁棄驂騑貝錦徒虛織華簪  
信久抽雄心輸寸翰矯志傲崇丘苑囿晴偏媚文章老  
更優欵成荆國寶興狎嵒湖鷗漫擬歸同趣翻憐抱別  
愁栖栖應去魯碌碌似依劉旅服凋廢縕行裝斷蒯緱

關門繻用棄幸舍轄隨投促席傾宵雨聯牀聽曉籌素  
交欣再接新好競相求阮氏才皆俊岑家燕屢修未辭  
漢陂賈直愛竹林幽卒歲慚多累餘生實寡謀襟期良  
有待會面渺無由契託他山石情懸剡曲舟尺書題字  
滅欲致定沉浮

吳兆

癸卯元夕曹能始席上咏夾燈屏得花字

火樹當筵出燈屏繞席斜逶迤一片影匝匝九枝華薄

素流明月層波浸百花龍膏然作霧鶴彩散成霞曉戶  
鶯窺鏡春牕蝶誤紗盈盈空內外瞰客若為遮

冬至夜集曹能始園亭觀伎

佳侯要佳麗山齋啟暮扉入園驚荔發窺瑄見灰飛梅  
亂歌中落春爭笑裏歸橙香寒磧面桂氣暖薰衣粉壁  
釵橫影雕窗燭散輝不堪絃管歇殘月尚棲幃

偶書閨中風土十韻寄金陵知己

風氣南來異行行歲月賒梅香逾五嶺猿響類三巴時

見蠻烟黑還驚左語譁舟中喧水碓城上出人家荔子  
家家種榕陰處處遮居民晴著屐市女晚簪花短蜮能  
伺影蜚魚會噴沙螭房經雨吐石蛙入春華劒浦龍何  
在螺江事可嗟好遊非向子錄異是王嘉鄉信難逢鴈  
歸期易及瓜吾生從汗漫世路更無涯

元旦書事

閩中風景麗元旦百花開有岸皆繁草無波不染苔樹  
光搖粉蝶雲彩照金壘濃黛新年點春衣隔歲裁夜鑪



藏宿火曉燭剪殘灰袖裏分餘蕙釵邊罨落梅松枝當  
戶插椒氣拂牕來正好隨懽笑那知客思催

人日立春林民部宅觀伎

雙節值新年東風裊伎筵土牛官鼓迓彩燕內人傳杏  
子裁衫薄梅花點額圓歌深眉黛蹙酒重臉紅妍香霧  
迷窗鳳金屏影柱蓮尚書舊東第賓客喜重延

集林光祿新第得花字

到戶塵喧遠開門蕙徑斜圖雲流礙棟刻鳥立窺紗帶

筍移鄰竹栽枝寄別花殘霞藏宿雨弱柳墮栖鴉亭敞  
分歌伎池清漾釣槎誰言光祿第定是石崇家

獅子巖

石罅置檐楹高低縱復橫臨深暢幽意極嶮盡遊情火  
照潭心影經傳洞腹聲際眉巖電射繞足礪霓生潛怪  
禪能伏蹄鼯狎不驚欲窮前勝處無路若為行

過吳門訪沈野范汭攜酒至因賦

臯橋通市外鴻墓即城隈芳躅君能繼衡門客到開藥

香餘石臼茶綠泛山杯鄰圃花迎發東家酒送來池萍  
初點絮階筍欲穿苔誰復尋行跡荒蹊不剪萊

春日過馮祭酒孤山別墅

池館青春好泉臺白日辭梅香曾賞處柳發獨攀時湖  
舫遊新主賓階生旅葵野煙沉酒徑山月冷歌帷鄰起  
山陽遂庭閒謝傳棋還聞有遺令開閣散諸姬

過西湖懷曹大參學佺

每憶同遊處悽然起舊懷蘭舟曾泛泛春鳥正喈喈幾

訪孤山影常持淨寺齋苦吟花閣曉泊月柳橋佳此別  
經三載聞官進兩階旌驂臨蜀道賓客散秦淮出祖龍  
江日嗟余不克偕

法海寺

野航時可繫林寺畫猶局古木無年歲清陰滿戶庭客  
來方禮磬僧坐但翻經煙起炊茶竈聲聞汲井瓶窗過  
湖鳥白簷挂葉蟲青蔬飯欣然飽徐徐步遠坳

王醇

寺居谷陸無從先生六韻

還鄉亦是客棲寺宛如僧麥飯邀孤磬花龕懺一燈夜  
寒分白蟾月好借青藤病起惟嫌雨心清似結冰所思  
窮巷隔相望亂愁凝幾日東林下秋風落葉層

倪元璐

皇極門頌歷作

鳳闕開彤旭猊爐散紫煙六階齊度緯七政轉璣璿甲  
歷龍躔改寅賓象魏懸明時功在革資始義承乾黑帝

威初試青皇位早傳周官新月令甘氏舊星篇人繼羲  
和後書成冀英前庚先三日戒貞下一元旋圖錄符垂  
赤干支德應玄興王惟省歲太史又編年賜出黃星曜  
披看綠字鮮因知天厯數如日起虞淵

黃景昉

何太常悌邀步南郊覩園丘享殿齋宮諸制恭  
述

皇矣穹窿廣君哉制作殊改絃歌世廟分祀別留都日

練金支秀春迴華蓋趨竹宮靈放悲羽客韻虛無繭栗  
三犧用瓜華百末敷篆煙颺鬱鬱影入珊瑚富姬壇  
仍峻高皇座稍隅殿詢公玉帶庭接鬼庑區憶昔陪清  
蹕於茲享大雩鳥銜齋饌素沙點布袍烏重許窺閭闔  
須知辨濮瀘帝真雲漢主天轉斗牛樞禁地人雍肅祠  
官汝敏膚秩從夷典禮倫始契司徒誰獻河東賦空吹  
冀北竿戚干容肆雅卿景合賡虞

李世熊

萬石山信宿

凌晨曳杖策巘疊貯雲多流水看人盡微風帶鳥過磴  
穿山骨巧葉改樹顏酡目刮峯皆異竅虛籟盡和浮杯  
依石醉倚簾納泉歌桂魄扶飈冷烏痕染月皤何能從  
五嶽天寐此槃阿

譚貞良

樓桑先主廟

系出中山近名從小沛聞卜鄰占李定望氣得周羣象



叶黃龍瑞符仍赤帝文全家賴脫險一旅忽能軍名士  
收諸葛英雄獨使君志寧摧百戰力已限三分淚盡髀  
生肉魂歸棧入雲枯桑遺廟折野火斷碑焚繫馬臨風  
至題詩塞日曛粉榆存舊社絃管尚紛紛

吳騏

寄懷金天石

旬日陪吟嘯雄才爾不凡風雷生動蕩渾沌剖機緘鵬  
鷖為旗幟蛟龍受轡銜清思三峽永奇句一峰巉照乘

珠何麗連天草盡芟赤文搜玉笈梵字出金函憂擊能  
忘寢華腴亦解饒驪歌忽戒道鳳德阻深巖雨積黃梅  
苦潮連碧海鹹地同梁傳濕愁似楚人讒四望傷王粲  
多能憶阮咸欲知求友意梁上燕呢喃

王鐔

留別白門同病

濩洛猶諸子蕭條更此身  
自知行有恨敢謂至無因  
是石吾宜則非竽世莫珍  
匡衡經易詘孫寶道難伸  
帙冷

囊螢燼門蕪食雀馴秋期松寺杳夜遂酒燈頻瘡苦柳  
榆鬼貧甘俯仰人奏廷書未乙丐緼紙徒申洞口投棊  
局城陰結釣綸叩門惟劇孟斷席共田仁醉泥寒雲外  
行迷夕水濱自竒雙履跡誰落一冠塵山黯浮雲髻江  
明凸地銀染村楓色敗董畫袖香陳旅食嗟何賴鄉醪  
報已新扁舟東下疾煙霧隔沾巾

良琦

吳水西袁子英憇余寓所有懷玉山匡山雲臺

以端字為韻

蘭若清溪曲苔蹊宿雨乾閉門書自展扣竹客相看蓮  
社容沽酒松房可挂冠風流成雅會慷慨失幽歡日落  
江聲急山空玉氣寒桃源人已去柳徑菊初殘簪盞賓  
朋集田收秫米寬鄭莊元好客陶令獨辭官詩意迂辛  
好才追短李難交遊敦道義出處共盤桓昨日山行樂  
連朝興未闌孫登嘯絕響靈運屐寧刳眺遠欣情豁臨  
深怯股酸石奇祥鳳舞池碧老蛟蟠曲磴與頻憇蒼崖

向欲刊披煙行犖确拂雪到嶺岼巖橘黃登俎畦松綠  
在盤空迂長者轍真具腐儒餐聚合驚雲散睽離見月  
團鹿鳴還自詠流水不成彈鴻鴈啼荒浦鳬鷗落暮灘  
冲襟聊一寫搔首睇雲端

歲暮有懷玉山蕪東彥成子英

城府一會面塵埃各滿襟  
息息官寺飯草草市樓斟  
歸棹隨沙月飛帆拂渚禽  
妓妝紅照水仙侶玉為林  
宅近梅花早溪清竹葉深  
佳兒候門喜好客向筵臨  
閣暖簾

圍繡香溫鼎錯金酥盃春酒味錦瑟夜絃音賀老狂猶  
在袁安瘦不禁文章會社友園墅憶君心池隔茅亭靜  
山當雪洞深想聽松子落應念野僧尋世態今輕薄江  
湖有陸沈卷阿誰復賦招飲且高吟時見秋氛息年催  
雨雪侵新詩肯相慰把玩比璆琳

妙聲

送僧歸日本

碧海蓬萊外扶桑日本東居然成絕域久矣染華風王

化能柔遠遐琛亦會同佛書龍藏古梵夾象胥通問道  
來飛錫浮生若轉蓬中朝師法在厚往聖恩隆歸羨翩  
翩鶴吟瞻肅肅鴻片帆唯就日萬里若游空洗盃鮫人  
室焚香海若宮將迎煩國主感歎聚鄰翁告別行何遽  
題詩媿未工懸知音信絕徒望海霞紅

廣潤

賦得新月柳

初月生明夜嬋娟映柳時幽暉凝露葉淡影弄風枝寫

黛將開鏡停梭未理絲絃調銀指甲珮曳翠腰肢顧兔  
眠還起驚烏舞乍敲一痕青眼媚萬縷素心知濯濯俱  
盈手纖纖互鬪眉攀條悲往事流彩誤佳期偏照深閨  
夢長牽故國思關山正愁絕莫向笛中吹

賦得東鄰美人臨潭水二十韻

窈窕東鄰媛明妝綠水洲有懷殊繾綣無夢獨夷猶汎  
瑟來湘浦為雲下楚丘洛妃嬌自倚漢女愧同遊靨輔  
宜嬌笑丰神洵好逑釵沉將化雀珮響欲驚鷗練渚霞



裾耀蘭皋路，屨幽蓮花矜。並蒂羅襪詫，分鈎亾凌波。  
怯低回，照面羞却憐。潭上影還似錦中愁，寫黛雙顰翠。  
橫波并作秋翻疑，身不定，轉覺意相投。濯髮尊絲亂牽。  
情荇帶柔，素書魚斷絕。紅怨葉沈浮，物候紛搖落。津途  
漫阻，修君心寧比汜。妾命宛如漚。珠浦誰當合，龍淵孰  
與儔。煙帆勞倚望，江杵倍離憂。落鴈青峰外，疎燈古渡  
頭。斷腸人不見，日暮水空流。

方孟式

秋夜林

林深長寂寂夜永漏迢迢月透玲瓏砌花舒宛轉嬌銜  
杯浮竹葉得句點芭蕉池瀉芙蓉面風輕楊柳腰流星  
喧蟋蟀零露濕鮫綃銀漢翔鴻鴈煙霞隱玉簫清閒自  
今夕風雨妒明朝萬木紛飛意相思到六橋

章有渭

春感

舞蝶莊生夢啼鵲蜀帝魂紫芝逢勝友芳草想王孫小

閣聞雞唱閒庭聽鳥喧  
曉煙迷麥隴春霧鎖柴門  
魚戲青萍動風吹碧葉翻  
綵毫題玉柱綠蟻引金尊  
乍摘蕤草長依翡翠軒  
避秦無絕境何必問花源

景翩翩

寄情十四韻

握粟詹予美端著竟我欺  
前魚如未棄下鳳故應遲  
荏驚吹律悽涼憶屢綦  
漫餐妃子秀虛齧舍人飴  
嬾去初侵鬢顰回却到眉  
淚痕留琥珀花勝淡燕支  
露遣冰

紉冷風傳畫角悲題盤緣伯玉擣素事班姬苦海填愁  
遍盟山著恨移秋深仍繫帛日入已棲埒石闕何能解  
刀頭尚可期三緣徑曲折五內幾妍媸塵掩菱花鏡心  
搖桂葉旗何妨梁下信更作有情癡

王微

汪夫人以不繫園詩見示賦此寄之

湖上選名園何如湖上船新花搖灼灼初月載娟娟  
啟光能直簾鉤影乍圓春隨千嶂曉夢借一溪煙虛閣

延清入低闌隱幙連何時同嘯咏暫繫淨居前

游牛首閱春江即目

初晴開柳色忽照片檣懸林遠鶯聲倦江流月影圓餘  
花繡崖谷幽翠染雲煙雨帶前朝夢春留昨日妍平洲  
雙鏡合靈院一燈然只此佳游際疑參雪後禪


許筠

謝編修黃公惠詩扇

越索傳輕策良工制作勞古藤分剡曲寒竹截湘臯洒

落留清什飄揚動彩毫書因逸少重價為謝安高自得  
雙金贈還同一字褒年年火雲日長是憶仙曹

御選明詩卷九十四



總校官庶吉士臣侍朝

校對官編修臣莫瞻菴

謄錄監生臣和其聲